

non, i sort Pondichéry, véy son dansé! kan ou koné in pé bal tamoul, ou wa byin li dans in pé malbar, mé apré son santé « valé valé, sas pizon, la bèl, la révérens, sapo an min » sé in vié romans fransé. Gramoun Lélé kan li prézant la troup-pli kaf ke li na pwin - li di li pran bon dié malbar, li koné sérémoni malgas, li sant gro léspri é an plis li di li giny zoué lakordéon, mizik an kuiv. Na in mélanz la dan mé ou wa pa toutsuit. La rényon lé an larmoni, sak kominoté i viv inn a koté lot. Mwin lé byin plasé pou fé war tousa lé ansamn é sé sa mi apèl batarsité... mi di mwin lé pa blan, mwin lé pa nwar, mwin lé pa dé koulèr, mé plinn koulèr, plinn kiltir, plinn zapor avèk lo batarsité. Anou, lo métisaz lé déza dan sak rényoné, lo blan, lo malgas, lafrikin, lindyin, lo sinwa ; sof kèl dozaz, kèl dégré selon larivaz lib, pa lib, ris, pov, na lontan, pa lontan, sak moun sé in lekzanp. Intèl sera tanté dir « a mwin kaf, a mwin malbar », li va pran in fasyiès, in lidé in pé zénéral, in fason pli for ; mé si ou grat byin, si ou di a li rakont son zistwar, li va di a ou « a bin papa té sa, momon té sa... ». Si ou vé mèt sa an blan ou an nwar, ou giny koud kony sak instan. Ala mon lanaliz batarsité ! Mwin té vé mèt tousa dan lo morso.

#### **Mi plèr pa kan mi di mwin lé batar.**

**o kontrèr mi réspir, mi dans. mwin lé kontan.**

Mi di domoun alé rod zot pir si zot i vé : pir lind, pir lafrik, pir sinwa, pir blan... mwin mon fér blan i débord ! Mi giny mon bonèr ek mon mélanz, an répons a domoun i di nout nasyon lé pli vilin, pli mové, pli kriminèl parské nou lé mélanzé... kom partou, lo métis lé touzour mal vi. Kan mi sant batarsité ou dot morso, sé pou dir domoun, nou na in risès. Mi plèr pa kan mi di mwin lé batar... o kontrèr mi réspir, mi dans, mwin lé kontan. Ma la pa pran lo mo métis parské li fé mo dord komandé in pé par lo blan. Li vé lo nwar i bouz pa tro, i ravaz pa... mwin mi vé i ravaz, mi vé pran lo mo batar parské li farfouy a nou plis, li koréspon plis a nout sans, é lo mo métis lé déza in mo kart postal : blan, nwar, kafé o lé. Nou sé la réalité, lé pa zordi i fo di a nou « métissez vous ! » nou la finn fé sa nou !!! Dann douèr, dan lamour, mé nou lé la. Nou lé mélanzé é sa i tonm nout risès. Mé solman, la konsians lé an retar par rapor la réalité. Lé normal, dan la réalité la bèz shabouk, la èkzil domoun ; isi nou la rekonstrui in ot zafèr nou ! Pou mwin sé in ot sivilizasyon. Mwin lé in produi de tousa la. E si na demoun i vé artourn an arièr an vré indyin, an vré malgas, an vré fransé, mwin mi

giny pa ! I fo kiltiv la konsians pou tonm dakor ek la réalité.

Souvan, kan nou lé déor, nou pran konsians kousa nou lé. Mwin la fé in rèv kan mwin té an prizon an frans. Pandan in semènn mwin la fé lo minm rèv : « mwin na in permisyon, lavyon i amèn a mwin, i poz koté la kaz trwamar é motèr i tourn, démérd a mwin ! alé ramas piman vitman ! La, mi kri lo vyé pou èd a mwin ; tout la famiy i ramas, shakinn in korné zournal témwaniaz, i ranpli piman, lo motèr i tourn touzour é lo rèv i arèt la ». Mi vyinn rant an prizon, mwin lé lwin é na pwin piman an prizon. Na pwin pié zak, na pwin la lang, na pwin kafé griyé, na pwin ryin. Piman la tonm lo reprézantan tou sa la, kom in révèlatèr lidantité.

#### **Mèt pa nout patrimwann dann in mizé. mèt dan lékol !**

Batarsité i koz si lidantité : ki sa nou lé an tan k'rényoné ? Mé lo batarsité i done a mwin luni-versalité, li lé pa férmé. Nou na louvèrtir isi nou ! Nou na risès la, lé pa a koté, nou lé ann dan. Sé pou sa mwin lé pa tro dakor èk lo mézon sivilizasyon. I pé pa kolé. Si i fo fé in mézon, sé pou la sivilizasyon rényoné. Dan mon lidé d'in kiltir mélanzé, i fo kiltiv sak nou lé, i fo étidié sak nou lé vréman èk tout lo bann zapor. Fo pa mèt sa an mézon, an mizé. Sa in zafèr pou fé vizit a nou kom zako... Mwin lé pa dakor ek sa ! Mèt tout nout valèr dan lékol, mèt sa èk marmay... ankouraz sa plito k'fé in gro piton vizitab santré si Sin-Pol... Si ou vé lès in tras, mèt pa dokiman ék patrimwane dann in mézon ! Mèt dan lékol. Mwin lé angazé dan lo konba politik. Domoun i wa a mwin dan parti kominis ; mwin lé otonomis depi ti parské mon papa té kominis. Kan ou lété angazé otonomis avan lé zané 80 apré i fonksyone pi parèy. Lopoziyon na in sans avan 81, avan la libérté dé zonn : na in sél radio, in sél télé, in sél sonn klos. Na in mir an fas de ou. Donk ou lé déterminé, angazé dan le fron la zènès otonomis é pi apré la fane partou. Depi 76 i komans sanzé. An 78 par ekzanp, kan mi rovyin, mi refiz larmé. Sa sé in langazman personél mé le PC i kondane mon laksyon. Le PC i di mwin sé in militan antikolonialis, mé mi atann pa li pou fé mon laksyon. Langazman lé an minm tan dan in mouvman é an minm tan in zafèr personél. An 4<sup>ème</sup> mi fé in rédaksyon an kréol, an foutan. Mwin té rebèl, somanké pou afirm a mwin : lékol, dominasyon fransé, profésèr. An minm tan na in réékilibraz, mwin la bezwin dékoné, ékzisté par rapor la kaz, lé pa si klèr k'sa. Na in vi d'famiy for, mé an minm tan lo vyé